

REGIONAL NEWS BULLETIN

HEADLINES (MORNING)

- 1. Mizoram BJP chuan West Bengal-a Kristiante chung a hleihlenna thleng leh Biakin suasam ani chu an dem thu sawiin thuneitute rang taka action la turin an phut.
- 2. ICT Minister Dr Vanlalhlana’n mipuite himna tura an mimal zahawmna vawnhim sak, an hamthatna tur ngaihtuah leh rinngam nih chu sawrkar tihtur pawimawh tak anih thu a sawi.
- 3. Mizoram sawrkar chuan Mizo Taxi App hmangtute chu wawiin July ni 10 atanga August 10, 2026 thleng enchhinna (trial basis) atan tlanlohni nei lovin nitin tlan a phalsak dawn.
- 4. FIFA World Cup 2026 quarterfinal nizana inkhelah champion tura rinkai France chuan 2-0 in Morocco an hneh..

<><><>

MIZORAM BJP

Mizoram BJP chuan West Bengal-a Kristiante chung a hleihlenna thleng leh Biakin suasam ani chu an dem thu sawiin thuneitute rang taka action la turin an phut.

BJP thuchhuah tarlan danin West Bengal-ah July ni 5 Pathianni-a Kristiante chung a thil thleng leh Biakin suasam ani chu an dem takzet an ti a, India chu hnam tin leh sakhaw hrang hrang zalenna hmun anih angin heng thil titute hian dan an bawhchhia tih sawiin thuneituten a rang lama action la turin an phut a ni.

Thudawn danin July ni 5 ah khan Sonarpur bial chhunga Suvas Gram-a Mizoram Synod biak in sak lai chu misual rualin an bei a, biak in chung a kraws intar an la thla a, heng bakah hian biakin bungraw hrang hrang an suasam baw a ni.

BJP chuan Faridpur ah Grace Church-a inkhawm lai beih chungchang pawh an dem thu sawiin thuneituten rang taka chhui turin an ngen a ni.

BJP Mizoram President Dr K. Beichhua thuneitute chu a rang lama pawikhawhtute man chhuak tura ngen in Zoram pawna Mizo Kristian hrang hrangte tan an awm reng dawn tih a sawi a ni.

BJP General Secretary Lalfakzuala Hauzel chuan thuneitu sang lamah an lungawilohna an thlen tih sawiin Mizo Kristiante tan an awm reng dawn tih a sawi a ni.

(Desk)

<><><>

RAIN HAVOC

Tunkar chhunga khaw cheng chuan state chhung hmun hrang hrangah chhiatna a thlen a, hmun thenkhatah inkalpawhna kawng ping awm in tui lian avanga chenna in chhuahsan tam tak an awm.

Aizawl District Disaster Management Authority hotute chuan Mizoramin furpui a tawn mekah mi tinte’n mahni chenna in bula tui luan kawr leh tuichhe paihna uluk taka enkawl a thli thlai reng turin mipuite an ngen a, Aizawl District chu chhiatna a awm thulha hmalak zung zung a nih theihna’n Zone 17 a then hran a nih thu sawiinin mipuite chi ai mai lova, khawtlang hruaitute emaw sorkar lam hotute hriattir vat tur an nih thu an sawi baw.

Hetihlai hian National Highway 54 Bualte dai leimin chuan kawng hnawh ping vekin, lei minna hmunah hian ngawrh takin then fai hna an thawk reng a, amaherawhchu lei a la tlak belh zel avangin kawng hi tun dinhmunah a la tlang rih lo a ni.

Tunhnaia ruahsur avang hian Khawthlangtupui leh Mat lui chu a chim chin a sang chho zel a, Mat phaia awm thlai tam tak chim tawhin Khawthlangtupui lian zel avangin Tlabungah chhungkaw tam takin chenna in an chhuahsan baw a ni.

Lawngtlai District ah pawh leimin avangin inkalpawhna kawng hmun hrang hrangah leivungin a hnawh ping a, Khawzawl ah chuan khawpui chawmtu ber Greater Khawzawl Water Supply Scheme tuilakna Tuichang lui tui chu a nut avangin tun dinhmunah pump theih ala ni rihlo a ni.

(PTCs)

<><><>

ICT MINISTER

ICT Minister Dr Vanlalhlana’n mipuite himna tura an mimal zahawmna vawnhim sak, an hamthatna tur ngaihtuah leh rinngam nih chu sawrkar tihtur pawimawh tak anih thu a sawi.

Aijal Club, Mc Cable Hall-a Information & Communication Technology Department buatsaih nikhat aw h ‘State-Level Workshop on Strengthening Cyber Security Frameworks for State Data’ zirhona a hmanpui na ah he thu

hi a sawi a, Dr Vanlalhlana chuan mipuite thil vawn that sak chu sawrkar mawhphurhna ani a ti a, sawrkarin mipuite digital data tam tak kawlin mimal kaihhnawih bakah ram chhinchhiahna te leh hamthatna tam tak a tel a ti a, heng hi sawrkar tan hmanraw tangkai tak ni mahse fimkhur ngaihna tam tak a awm tih sawiin mipuiten rinna an nghah theih nan vawnhim a pawimawh thu a sawi a ni.

Minister chuan mipui ten digital governance-ah rinna an nghah theih nan Data enkawl kawngah digital entry point te khauh taka vawn him a, a pawi thei chin mi dangin an hmuh theih lohna tura khuahkhirh vek a nih theihna tura tunlai thiamna hman a ngaih thu sawiin, automated monitoring system-te pawh hman tangkai a, minute reilote chhung pawha security system-a thil pawi awmte hmachhawn vat thin a tul thu a sawi bawk.

ICT Minister chuan zirhona chu hun lo la kal zel tur atan Mizoram digital security atana hmalakna pawimawh tak a nih thu sawiin kalkhawmte chu cybersecurity phurrit anga ngai lova, rorelna tha, langtlang taka kalpui theihna lungphum anga en turin a ngen a ni.

(DIPR)

<><><>

SPORTS MINISTER

Sports Minister Pu Lalnghinglova Hmar chuan Zirna inah infiamna lam hawi zirtirna tha naupangten an dawn a pawimawh thu sawiin naupan lai atanga chher hriam chuan rah duhawm a chhuah thei tih a sawi.

Mizoram State Sports Council leh Samagra Shiksha Mizoram tangkawpin an kalpui Grassroots Sports Development Programme zirchianna a tlangzarhna ah he thu hi sawiin Pu Lalnghinglova Hmar chuan Grassroots Sports Development Programme chu aan hmalakna phurawm ber zing ami a ni a, zirna innah infiamna lam hawia hmasawwna awm turin zirtirna tha naupangten an dawn a pawimawh thu a sawi.

Sports Minister chuan infiamna leh zirna hmasawwna chu a kalkawp thei tih sawiin naupangte thiamthil hai chhuahna leh tih hmasawn kawngah hmalak ani dawn a ti a, hma lam pan zel an beisei tih a sawi.

Grassroots Sports Development Programme hi Mizorama district 11 a Training Centre 46 ah kalpui a ni a. Sports discipline hrang hrang pakuaah naupang 1380 an inziaklut a ni. Heng zinga 34% chu hmeichhe an ni.

(DIPR)

<><><>

MIZOTAXI APP

Mizoram sawrkar chuan Mizo Taxi App hmangtute chu vawiin July ni 10 atanga August 10, 2026 thleng enchhinna (trial basis) atan tlanlohnnei nei lovin nitin tlan a phalsak dawn.

Aizawl Traffic SP C. Vanlalvena chuan nimir khan thuchhuah siamin MizoTaxi App-a in register taxi zawng zawngte chu July 10, 2026 atanga August 10, 2026 thleng enchhinna atan tlanlohnnei nei lovin nitin tlan phalsak an nih dawn thu a sawi a, Traffic SP chuan ruahman chu danin thuneihna a pek angin leh Nilaini-a Co-ordination Committee on Traffic Management thukhawmin a rel ang leh mipuite mamawh phuhruk nan Mizoram State Transport Authority ruahman leh pawmpuina anga kal a nih thu a sawi a, enchhin hun chhungin MizoTaxi App-a in register tawh taxi-te chu Taxi tlanlohnnei danin a huam dawnlo tih sawiin in register tharte pawh Taxi tlan lohni in a huam loh tur thu a sawi a ni.

Traffic SP chuan MizoTaxi App-a in register taxi zawng zawngte chu STA-in a pek MizoTaxi App sticker chu an taxi hma leh hnungah tar turin a hriattir a, Lirthei dang Mizo Taxi App-a inziak lut lo te chu intlanchhawknadan zawm chhunzawm zel turin a hriattir bawk.

(Desk)

<><><>

CHAMDUR ‘P’ ROBBERY ALLEGATIONS

Chamdur-I Presbyterian biak in chei that hna thawk mektu (sub contractor) Labiakzuala, Thingsai, Hnahtthial district, tuna Salem Veng Aizawl-a cheng mek suam a nih dan chhui mekah Mizoram Police uluk takin an chhui chhunzawm zel a, finfiahna erawh hmuh ala ni lo.

July ni 7 thawhlelni khan Lalbiakzuala hi Bolisora-a mamawh lam tura a kal haw lam chu Chamdur 'P', Lawngtlai District daiah tu tih hriat loh ralthuam keng mi pariatin an lo suam thu Police-in an dawng a. Misualte kuttuurtu Lalbiakzuala sawi danin, heng mite hi ramhnuai atanga lo chhuakin amah hi an dap a, a lo tan deuh avangin silai kawmin an chhu a, rakzu fun nga leh pawisa ₹600 laksakin an tlanbo a. A sawisatu zinga mi pathumte chuan AK rifle kengin midangte hian ulhbun bakah tualchher silai an keng niin a sawi a ni.

July ni 8 Nilaini khan Vasei Police Station atangin Officer-in-Charge hovin Chamdur 'P'-ah hian kalin chipchiar takin thil awmdan Chhui zui zelna atangin a tuurtu (Lalbiakzuala) hian mi dang kaltlangin Bolisora-a mi hi zu a lei ngei tih finfiah a ni a. Hemi hnua zu lei belh tura Bolisora-a a kal nawn leh nia a insawi erawh a zuartute chuan an hriatpui loh thu leh hemi hun lai vel hian lo lamah hna an thawk a, tu hnenah mah zu an hralh loh thu an sawi.

A tuurtu thusawi innmil tawk lo nia lang te, kut tawrhna hliam hmuh tur awm lo te, thuhretute thil sawi dan nena inpersan tak tak thil a awm avang leh thil chhui tawh chin atang hian he insuamna hi tun thleng chuan finfiah loh a la ni. Police te chuan uluk leh ngawrh takin he thil hi chhui zui zel an tum thu an sawi a ni.

(PR)

<><><>

DRUGS SEIZED

Mizoram Police chuan tunhnai khan ruihhlo leh dan phal loh thil engemawzat a man a, hemi kaihhnawiha inhnamhnawihte man an ni bawk.

Nilaini khan Saitual Police Special Team chuan Kualmawi Check Gate-ah lirthei endikin TATA truck atangin Heroin gram 102 a rit man a ni a, ruihhlo hi sahbawn bawm 9-ah pack niin, cheng nuai ₹20.40 vel man hu a chhut a ni.

Champhai Police Special Task Force-te chuan thawhlelni khan lirthei pakhat atangin Manta Ray/Mobula samkhuih (gill plates) ro nia hriat, ip 9-a khung, kg 210 vela rit thuhruk chu an man a, Heng an thil mante hi international black-market-ah chuan cheng vbch ₹2.30 vel zeta hlu tura chhut a ni a, Mizoram chhunga hetiang thil man tam ber tum nia ngaih a ni.

Thawhtanni khan, Zokhawthar Police-te chuan Zokhawthar atanga Aizawl pana tlan Maxi Cab Sumo pakhat chu lo tidingin, heroin gram 48 an man a, Thawhtanni vek khan Aizawl District Special Branch (DSB) leh 34 Assam Rifles tangkawp chuan Aizawl Lawipu veng-ah methamphetamine kg 1.955 a rit, vaibelchhia ₹1.60 vel zeta hlu chu Marcus Lalvenpuia (kum 19) Mamit District-a mi kut atangin an man bawk.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

C. LALTANPUIA

Tunhnaia ZPM Consultant atanga chawlhthir Pu C. Laltanpuia, Aizawl Chanmari chuan nimin khan ZPM General Headquarters President hnenah ZPM Party Primary Member a nihna atanga chawlh thu a hriattir.

President hnena lehkha a theh luhah hian Pu C. Laltanpuia chuan, an Party-in sorkarna kum thum dawn an chan mekah ram tana hmasawwna ro tling tur ruahmanna mumal, thangthar lo la awm tur te tana ei leh bar a intodelhna ngelnghet siam kawngah hmalakna mumal a hmu lo a ti a, ram hmasawwna atan a rilru hmanhmawh chi anih avangin an tlai chho mek tih sawiin a thiam dan leh phak ang tawkin a hmathlir a auchhuahpui thu a sawi.

Pu C. Laltanpuia hian July ni 7 (Thawhlelni) khan Aizawl Press Club-ah thuthar thehdarhtute a kawm a. Hetah hian ZPM kal dan a duhkhawp loh thu a sawi a. A tuk July ni 8 (Nilaini) khan ZPM Party chuan ZPM Consultant a nihna an hlih sak a. Primary member a nihna erawh ZPM Political Affairs Committee (PAC) ngaihtuah tura tih a ni.

(Desk)

<><><>

VANLALHMANGAIHZUALI

China khawpui, Beijing-a foreign sponsorship quota-a taekwondo zir paha lehkha zira awm mek Mizo player pahnih zinga pakhat, Vanlalmangaihzuali chuan 17th Beijing Taekwondo Super League, One Horse First Cup-ah gold medal a la.

Capital University of Physical Education & Sports-a inzir mek, New Diakkawn, Koladib nula hi China-a a awm hnua inelnaa a inlanna hmasa ber niin June 21-a neih inelnaah hian Senior Category Under 30 inelna huangah a inlan a ni.

Hmangaihi hi Mizoram Amatuer Taekwondo Association (MATA) player a ni a. Kolasib Taekwondo Club atanga zir chhuak niin Goa National Games leh National Senior Championship-ah pawh Mizoram tan gold medal lo la tawh a ni.

(Desk)

<><><>

PM MODI IN AUSTRALIA

India leh Australia chuan Indo-Pacific-a zalen leh huapzau taka chetvelna tur Joint Declaration on Defence and Security Cooperation leh Maritime Security Collaboratioin Roadmap an pawm.Nimina Melbourne-a Prime Minister Narendra Modia leh Australian PM Anthony Albanese ten Australia-India Annual Leaders' Summit-a an inbiak hnuin heng inremna hi siam a ni a. Thuchhuah intawm an siamah Prime Minister Modia chuan Indo-Pacific chu tuifinriat pahnih infinna lai mai niloin mipui rorelna ram India leh Australia te beiseina intawhna hmun a ni a ti.

(Newsonair)

<><><>

FIFA

FIFA World Cup 2026 quarterfinal nizana inkhelah champion tura rinkai France chuan 2-0 in Morocco an hneh. France tan hian Kylian Mbappe leh Ousman Dembelle ten goal an thun a ni. France hian Semifinal ah Spain leh Belgium-a chak zawk zawk an tum ang.

Zanin hian Quarterfinal khelh chhunzawm leh tur a ni a. Zanalai dar 12.30 ah Spain leh Belgium an intum ang a. Naktuk zing dar 2.30 ah Norway leh England an intum bawk ang.

(WC SFX)

(Newsonair)

<><><>